

光緒永嘉縣志

永嘉縣志卷之二十四

古蹟志四

金石下

明 嘉靖至崇禎

張孚敬詩石刻

嘉靖改元壬午秋永嘉羅峯張璉書於尙書省

右詩刻橫石一方乃張文忠金陵秋興八首石刻本有
二方今所存者下一方也詩自第五首起其前四首俱
在上一方石已無存詩見內編

重脩文丞相祠碑

右碑在江心寺嘉靖元年立文見壇廟

旌石碑陰記

嘉靖二年□□癸未孟冬穀日重立

此康氏尙義石碑陰記文漫漶不可識在應道觀後

石門寺鐵鐘款

浙江温州府永嘉縣賢宰鄉三十四都石門寺住僧德珍
號玉峯和尚募緣鑄鐘一口充入本寺祈保各人家門清
吉人口平安福有所歸者

嘉靖三年八月望前一日

右鐘在石門寺

項秉輔墓誌銘

右碑在茶山項氏宗祠墓與孺人王氏合葬陳雍撰文

其略云鴻臚寺序班諱良侶字秉輔行元十三號秋鶴道人公以表顯遂以表名卒於嘉靖甲申生正統庚申年八十有五以行誼楷書薦得試於翰林宋建炎初有任成忠郎諱芻者兄弟避金亂徙居瑞安大羅山中遂爲郡人碑立於嘉靖乙酉有畫像湖南謝宇有贊按項秉輔以字行見舊志諸科

汪節婦墓誌銘

明永嘉汪節婦陳氏墓碣銘

賜進士第光祿大夫柱國少師兼太子太師華蓋殿大學士國史總裁新都楊廷和撰文

予出禁門家居於架上取舊典閱之偶得古傳志載昔烈

女貞婦守死善道與大丈夫同一毅然獨立不懼之行因竊嘆其爲事之難能適內翰張天保詣門下持吉安守樂清朱君諫所爲狀爲其姻戚汪生守直守霄祖母陳節婦乞銘於予心若有惻然者按狀陳氏出由永嘉楠溪包山名族曾祖諱實祖諱詵父慶有良德隱而弗耀霞山之汪世稱焉諱素字允質者志操超特節婦初以淑懿婉偶幾五載允質俄以疾卒乃躬任其責竭力以營襄葬屏容飾服麗敝合門獨居其孤方二歲撫哺百至冀其有成以延汪氏祀間或人有撼其志者輒以死自誓曰若吾蹈此狗彘之行其何以見君子於黃泉聞者莫不義而稱之其處

事尙勤儉事舅姑篤孝敬愛其孤不溺情於禽犢遣之就
師傅俾之親賢士夫而遠里中之不良無行者其孤克能
樹立殖貲產興禮義以大其門庭實慈教力贊成之壽躋
六旬鄉老欲白有司上其事於朝以旌耀厥里堅拒曰
吾所爲亦盡分內事非以干名也事竟寢迨登八袞士夫
咸嘉其節而避其齒各賦詩祝之其孤作壽萱堂率諸婦
孫樂養於其中越二稔一旦忽遘疾遐逝是爲正德庚辰
七月十又四日也邇生於正統己未十二月十四日享年
八十有二其良人先卒於成化丁亥四月十九日孀居凡
五十四載男子一卽孤尙圃娶珍川朱氏孫男五守諫守

直守霄守分守爲守直歷事翰林院守霄太學生登嚮用
女孫一適包山陳希治曾孫七曰愿生仲生慈生璠生禎
生璣生欽生女孫二其孤卜以嘉靖乙酉臘月庚申奉母
襄事安厝於本里西奧之原合先君子之兆也嗚呼自其
始之秉志不踰觀之誠亦人之所難要其終之保孤兒裕
家業之績而言節婦賢母之名兩得之矣人臣輸忠於國
託孤寄命之操何以異於是哉予典

國史表節義以振世教職也因忘其勢分而爲之銘曰

玉斯皎兮磨不可磷 蘭斯馥兮猶不可焚 有貞女
兮德潤以芬 其賢人君子之倫

右碑在柵溪霞山

御製敬一箴碑

嘉靖五年立

御製宋儒范氏心箴注碑

御製程子四箴注碑四座

已上碑六座均在府學明倫堂

文不錄

朱文公像贊

朱文公像

篆額

文公自贊

從容乎禮法之場沈潛乎仁義之府是予蓋將有意焉而

力莫能與也佩先師之格言奉前列之遺矩惟闇然而日脩或庶幾乎斯語

右在像上方

都諫楊君士宜出

先生像并自題贊見示予既將祀之至先生所不自言者復爲贊下方云

嘉靖丙戌冬後學金廷桂百拜言

東遷生孔南渡生朱生皆庚戌歿皆踰稀孔子性之朱子身之載生聖人萬世宗師孔作朱述均集大成孔曰朱遜均老於行惟孔與朱天地之意非孔非朱曷天曷地華亭

金廷桂百拜贊

東光學教硯口金子宿慕

朱夫子文公而身體其學雖不必用於世然口名重海內
卽赫赫表著者未或能過之也爲刻斯贊與學者共祀之
抑以見金子大端云 永嘉長彭應麟跋

右在像下方

右碑在縣學文公祠卽學宮圖所載青雲館也彭應麟
華亭人進士永嘉知縣

外沙亭碑

篆刻四字

嘉靖丁亥年

右碑在東門外海壇寺側

聖諭碑

聖諭內閣輔臣楊一清謝遷張璫翟鑾

朕因十三日聽講官顧鼎臣解說心箴連日味思其意甚□□□□昨自寫一篇并假爲註釋與卿等看

嘉靖六年十一月十八日

大學士臣張璫謹

奏是月小至日伏承

賜內閣范氏心箴註一通臣稽首對揚乃竊歎曰至哉

聖人之用心乎漢董仲舒有言人君所爲必求其端於天

今陰極陽生一君子道長小人道消之時也在易之卦爲復曰復其見天地之心乎自非

聖人心學得之天其能體悉發明如此臣愚竊有感焉

昔讀書山舍嘗揭范氏心箴及程頤四箴以自勵蓋人心之漸衆欲攻之者口

人君一心萬化之主而視聽言動尤當加謹焉者也臣於御註心箴敬摹

宸翰付工刻石傳之天下萬世謹復錄程頤四箴乞

留神省覽

聖諭輔臣張璉

午間得卿錄來視聽言動四箴朕甚喜悅朕前日因聽講官講心箴回宮深加愛尙欲釋其義不能欲已之心未放過只勉強註畧仍咨於卿等欲爲藻潤以成所作卿何便付工刻石豈不取人笑乎朕自念上荷

天命爲人君長當務學以致其知待粗有領會之時再註四箴須賴卿贊之故諭

嘉靖六年十一月二十二日

臣張璁謹

奏昨者伏承

聖諭仰見

皇上緝熙聖學之至也宋儒朱熹有言自古聖賢相傳只理會一箇心臣切謂范浚心箴舉其綱程頤四箴列其目相爲發明者也臣以此用功餘三十年莫之有得今

聖明啟發一至於此真盲者之日月聾者之雷霆也臣何能贊一辭第當刻石頒布以覺斯世以廣

聖學之傳耳然而人見之莫不曰真

聖人復生非特堯舜之治見於天下而堯舜心法之祕道統之傳固有在矣程頤四箴尙願

聖明啓示謹當再摹

宸翰與心箴註並行刻布以爲斯民斯道之幸

聖諭輔臣張璫

卿前日所錄來程氏四箴昨勉強解註朕復思之程氏見道分明慎敬如此以教後人其功至矣但於濮議之中未免力爭邪說誣君奪子故朕又述數語於末云

嘉靖六年十一月二十六日

臣張璫謹

奏伏承

頒示

御註程頤四箴臣仰惟大哉

皇言皆根諸身心達諸政事真見

帝王之學與儒生大不同者也何能復贊一辭但末加獎

愚臣實不勝惶懼臣竊自念所務之學雖不逮程頤

而所遇之

主實萬爲過之頤在英宗朝代彭思永爲濮議論猶未定
皇上繼統與英宗繼嗣實大不同使頤居今之世議今之
禮豈得復守濮議之說哉謹將

御註四箴與范浚心箴通摹

宸翰並行刻布以嘉惠天下後世

聖諭輔臣楊一清謝遷張璁翟鑾

大學士張璉以宋儒程頤所作視聽言動四箴來告朕
深切有益於學朕讀已旬日輒述數語權爲註解用錄
出以示卿等

嘉靖六年十二月初三日

臣楊一清
臣謝遷
臣張璉
臣翟鑾謹

題

皇上所註范氏心箴及程頤視聽言動四箴俱已刻石乞
勅工部於翰林院後堂空地蓋亭豎立以垂永久仍
勅禮部通行兩京國子監并南北直隸十三省提學官
摹刻於府州縣學使天下人士服膺

聖訓有所興起荷蒙采納但亭宜有名伏乞

聖明勅定頒示內外一體遵行

臣

等又仰思

皇上前所著敬一箴發明心學甚爲親切宜與前五箴並傳令工部將敬一箴重刻一通分列左右以成一代之制其於風化良有裨益謹題請

旨

嘉靖七年二月二十六日奉

勅旨卿等所言都依擬行亭名與做敬一禮工二部知道

右碑在府學今立 萬壽宮後

勅少傅兼太子太傅吏部尙書謹身殿大學士張孚敬

卿以通博之才貞一之學首建正議贊朕冲人以成大禮
擢卿輔弼之任裨益良多近因人言乃有旨着卿口此朕
俾保全之意今輔導缺人贊理機務茲命行人周禪齋勅
往取復任辦事勅至卿宜疾速返途上緊前來勿得推延
辭避匪止諸事口口朕以口朕意卿其欽承故勅

嘉靖八年八月二十五日

諭張少傅

朕近以宋儒真德秀所著大學衍義重新刊印頒賜卿等
朕昨作一印記文曰格致誠正之方脩齊治平之道逐卷
之首一用之以識其書之所以教人也茲特以一部賜卿

輔贊政機之暇可以翻閱朕有向學之志力不能充卿當以是書以及二典三謨之書朝夕陳之庶朕或少知一二爲君之道不負 天命此朕賜書之意也卿其欽承之

嘉靖九年五月二十四日

勅諭元輔孚敬

近承卿奉命會議 郊廟諸典禮每殫思竭誠以贊朕念卿勞特以玉帶一賜卿其欽承之

嘉靖九年十月初八日

勅輔臣少傅張孚敬

昨吏部以卿一考已

下缺

佐朕未之少懈茲以

下缺

嘉靖十年正月

諭張少傅

昨卿再以更名謝夫卿以初名與朕名音因爲請改夫卿爲名之時未仕也似不可更改旣而又請朕以卿素存忠敬無刻忘之不可拒拂特准更之一字名之未盡卿之忠敬故爲雙名庶見朕意耳豈能盡其忠敬之誠至哉併茲諭後

嘉靖十年二月二十九日

諭張少傅

日前聞卿自爲堂房一名曰榮恩夫所謂榮得君恩也朕思皇考嘗手書斯三字朕恭裝軸并卿欲朕大書名與字者朕惟書有端楷健正之體乃可貴之朕素有志作字至今猶未成卿等每譽實自忠敬爾待朕學書另行茲併銀印一枚篆文曰永嘉張茂恭印及彩帛等物以賜以爲吾君臣相慶意庶見朕意云耳

嘉靖十年三月初三日

諭元輔張少傅

前者卿欲朕大書名與字昨乘興書得四幅但筆力止此而已併封去又朕有命卿凡有對奏當用新印卿以爲君

永嘉縣志

卷二十四

古蹟

金石

土

前未有臣稱字者朕惟此不同他人君所賜便是君命且朕止令對奏用上奏仍以原記卽此意耳朕知卿必曰君前不可用字故如前命之而猶以爲不可足見祇敬之至宜如朕命可也

嘉靖十年三月二十一日

右勅諭碑俱在大士門寶輪樓故址

御筆大書名字碑

二座

廣運

之寶

賜永嘉張元輔名

孚

敬

右名碑

廣運

茂

賜永嘉張元輔字

恭

之寶

右字碑 已上二碑極高大在張氏家廟上有廣運之

寶四字璽文左有御筆二字圓圖章右有嘉靖二字圓圖章中一行各七字下平列孚敬茂恭各二字大徑尺餘筆勢雄偉誠鉅觀也

御製詩碑

春亭

宗廟回見輔臣張孚敬以陪祀出侍立道傍有作

戊子新正吉春亭 祖廟親

祀禮忻已成

肅駕回宮宸

登輦偶回顧

輿南一輔臣

貌奇真才傑

形端忠氣伸

外焉秉貞一

內則抱忠純

誠正輔吾躬

清白飭乃身

予喜荷天眷

賚賢作邦珍

庶哉臯夔輩

望以康斯民

嘉靖七年正月初十日

嘉靖丁酉立秋日

光祿大夫柱國少師兼太子太師

吏部尚書華蓋殿大學士

臣張孚敬謹識勒

恭和

聖製詩一首

都宮左

清廟

尊祖兼親親承祀擬同日

龍旂出楓宸網常自天定父子與君臣吾

皇匪建極正論胡由伸乖違陋光武奏對羞張純咸知縻
爾爵孰肯忘吾身迷邦忍懷寶待聘誰席珍遭逢

堯舜主康濟

唐虞民

再恭和

聖製一首

聖作萬物覩莫不知尊親有官入秘閣無日離 嚴宸忻

忻臣遇 君恐恐 君擇臣國是到今定吾道原自

伸用賢豈惟急所貴心能純從茲得聯屬永終成乃

身稼穡代食寶藜藿忘味珍利見天上人只是山中
民

臣張孚敬頓首賡和

右碑在大士門張氏家廟

陳孝子墓碣

於戲孝者天經地義所關世道賴以維持者也國有斯人
則治家有斯人則興閭里有斯俗則爲善俗慨夫俗吏不
知此道而漫不加意此治所以不古若也東嘉集雲里有
孝子墓墓有亭斯墓斯亭幾百年矣淪於前興於後沒者
不沒死者不死豈非此道之不可泯也哉嘉靖戊子予守
溫值其復圯予復新之又爲門垣以護之因爲之碣過斯

亭觀斯碣者寧不有動於衷乎俾人人有動於衷則孝者
知所勸不孝者知所改矣其爲世道益者夫豈小也哉若
夫翁仲獸象亂迷荒草雨露悲悽往來興嘆視孝子者何
如也孝子姓陳名宗宋淳祐人董亭事者耆民陳璉時
嘉靖戊子孟秋望日溫州守黠白子丁瓚書

右碑在來福門外半里許妙果寺右陳孝子詳人物孝
友見宋史

重建尙義碑亭記

旌表許氏尙義碑陰記

篆額

中順大夫前北京兵部郎中溫州府知府趙錦重立

同知高美

通判儲宗周易

推官魏一恭

永嘉縣知

縣倪鏡

縣丞吳治

主簿吳永

典史別綸

賜進士出身承德郎南京兵部員外邑人徐廷傑撰書

辛卯王夏六月許氏祠亭成君子謂守候趙公能得其政
公刺溫越數月廣求先賢遺跡崇正祀典所以達愛敬昭
仁孝也厥類用章多士敷式而正理備矣茲亭豈特爲許
氏哉許氏之重有遇也右丞忠簡公爲宋鉅儒親受業於
二程講明正學與李綱宗澤輩夾輔王室厯事四朝大節
如一質守而正氣剛而直吾郡以文學爲世用者始專於
許氏矣傳至十一世孫名善繼者敦古崇義悅禮好施憲

宗時應詔輸粟助軍國者幾千石朝廷加賞補爲散郎命有司立石旌義延禮鄉飲大賓以風天下邦人多化之數十年廣許氏之學者自善繼始門祚中衰亭亦尋廢祀用弗虔非古人報德報功之曠典歟許生琥實丞之十三世孫也以狀上於公公卽惻然以爲民不見德是教之不行當道者之所憂也躬相厥土揆方定位選工度材需用咸足新亭翼翼堂宇騫革繚以周垣堅以甃甃債者起廢者興不數月而亭以落成邦人咸相稱慶以爲許氏有亭若將有待於侯也其殆政之成者與夫求治於政則禁令煩而民情不協求治於吾道則典章立而民德不好春秋有

薦享嘗有儀以教民愛肅雍承事駿奔在公以教民敬能
愛能敬而仁孝之理達矣率茲以爲治則倫理明風俗厚
國家之氣賴以鞏固不衰者豈少也哉信茲亭之建將以
示民有歸也德公之政者烏乎以不記

嘉靖十年孟秋 日立

右刻在飛鵬巷許氏尙義碑陰南向

張孚敬書墓額二字

特進光祿大夫左柱國少師兼太子太師吏部尙書華蓋
殿大學士甥張孚敬拜書

追思

嘉靖癸巳冬十月吉日

右神道額二字橫列在五十都鶴陽清白先生墓前清白卽謝德珰字庭琛德瑀之弟文忠之外祖也

勅原任輔臣張孚敬

朕惟君臣相得自古爲難惟卿也自中甲第卽奮志於忠不以身爲顧繼是厯居數任持一不回匡主愛君未或少懈前者小人構爲陷阱平地捏誣朕卽令卿回已昨又自不審慎機微又命卿回已適來星異衆疑之曰信哉君不明也使之去而復來致變甚其速也朕亦應之曰孚敬適到此異又見試且令自陳吁朕意卿却不會又云云數語

朕亦未放過三命回已夫朕所以用卿去卿其意不待自述後世以下明賢君子必不我私自有公論但卿何其自誤哉今自卿歸星芒未見速退應歟否歟他不必費筆劄矣今朕三召卿復任特令鴻臚寺左少卿陳璋齋勅超取卿若能識朕意則作速前來期使功名不自昧用全君臣之道卿若不能此者則暫來作賀朕得嗣之喜不爲害亦或慰朕思卿之至懷惟卿思之圖之故勅

嘉靖十二年十一月十三日

皇帝勅諭致仕少師兼太子太師吏部尙書華蓋殿大學士張孚敬

卿以內閣元輔朕所倚毗頃因有疾懇乞歸休朕察卿有不獲已之情乃用命□卿還鄉茲得卿來疏奏聞并賀省覽之餘具悉忠愛特遣錦衣衛副千戶劉昂齎勅往視卿疾如旣愈卽便來京勿負朕望果未除則當善自保攝用副朕眷念之懷哉故諭

嘉靖十五年六月初六日

勅舊輔孚敬

卿比以疾乞還久切朕思昨得奏賀朕躬平吉

聖母康泰及擇原選淑女內曰□王二氏朕御而各有嘉期將近已先□□□□并河南李氏京選王氏稱

爲敬靜二嬪又將於春三月躬行謁

陵禮奉

慈車率后妃禮成後又於四月之吉命工恭

七陵增造等項朕自作幽宮于

長陵左之陽翠嶺

卽十八道嶺更名

改小山一名平臺山以尊

皇祖太宗嘗御之地前次并往金山拜

皇高祖妣章皇后

皇曾叔祖景皇帝二陵奉

聖母舟回京今朕命使昂往視卿于家鄉如果疾未痊便
不煩以□□□□□□急來見朕副切思情勿自負

自棄以致朕懷於無已卿其念之□□

丙申夏至後旬吉

右碑在寶綸樓故址

慕恩亭記

慕恩亭謂何榮君之恩而思慕之也夫人臣孰不受君恩也而孚敬特至嘗以賜金作堂房榮君恩也示休戚同沒世不敢忘也上聞之以獻皇帝手書榮恩堂三字製軸御題皇考手澤四字旁注孝子皇帝識五字銀印一枚篆永嘉張茂恭印六字及銀幣等物勅賜以爲君臣相慶之意此誠千載以來人臣所無之殊典也然則斯堂之作也名

曰榮恩其諸異乎人之堂歟未幾賜歸山中孚敬慕君恩不敢忘也堂堂若見之旋復召至堂如故焉未幾賜歸山中孚敬慕君恩不敢忘也堂堂若見之旋復召至堂如故焉堂後嘗栽五柏作柏龕識歲寒也土敝不茂因拓地作慕恩亭環以柏識歲寒也慕恩謂何榮君之恩而思慕之也所以示後人世守之也夫君臣之義莫逃於天地之間而去就無常日月逝矣吾何容心焉孟氏曰仕則慕君不得於君則熱中大孝終身慕父母夫曰仕則慕君非真慕也皇上視孚敬義雖君臣恩猶父子茲慕也誠終身之慕去就弗與焉嗣此吾子孫當世守之永慕之則夫榮恩之

堂可無慕恩之亭歟因勒石以示我後人尙勛之哉尙勛之哉

右碑在張孚敬故宅後

重作堂亭記畧

余舊在京師嘗作慕恩亭有記蓋榮君之恩不敢忘也夫在朝慕君人情也今老病退休又豈忍忘耶因重作榮恩堂慕恩亭以紀其事皆在寶綸樓後焉

嘉靖丁酉七月上澣三日再識

右刻在慕恩亭記左方

白塔寺重修寶塔募緣疏碑

右在茶山嘉靖十二年臘月住持僧成欽疏

文不錄

東甌名鎮坊題名

嘉靖己亥夏四月乙卯吉

賜進士中憲大夫温州府知府郝守正

同知彭師有

通判陳璋煒

詹寬

推官李夢祥

隆慶五年

知府張國謙

右在府前東甌名鎮坊後一行乃隆慶時續刻也

龍渠書院祠碑

龍渠書院祠記

永嘉縣儒學教諭婺源洪光世撰

按郡乘永嘉肇千載文明之會材望輩出他郡莫及或謂
學宮枕山帶水屹在九山之中人固傑而地益靈惜學宮
□□學典禮樂事勸功實無所資焉士民病之弘治間
吳州南峰林公作邑殿廡堂宇廩爨齋舍聿□美異前所
未覩因□□院每歲血食之報不替嘉靖甲午復毀於
颶風越幾歲思不能支丙申長樂貞庵李公以名進士試
政是邑下車觀□□然謂曰政莫首此曷容於辭不半
歲整頓疏剔煥然復新先是蕩南朱君紀其事余不佞孰

敢尾之但公之德政有□□□其說者公平素惠以及下
廉以律身慈祥愷悌若甘雨和風每事從容不以意氣相
凌勝集門人論文講學兼□□□其名勢之爲官長斯邑
也士類賴以知名者甚衆而成名之士視昔有加焉庠士
請曰禮德施於民則祀之南峰之□□□繼維公之績於
南峰自有光焉矧公捐俸以竣其工於畢視民力者又過
之矣僉謀作書院於東山之麓學宮之左□曰龍渠書院
山前爲龍示諸生仰止之心也鑿渠引水源源不竭示諸
生不息之心也諸生藏焉脩焉息焉游焉九峰□□□曲
上應草木生香魚鳥自適見之如見公然傳曰愷悌君子

民之父母公之謂也又曰蔽芾甘棠勿剪勿伐龍渠之□
□□之後建斯議者生員韓金應奎王儒獻葉嘉慶全敏
學嚴廉華徵公之勤於教也耆老林暕劉密輩樂於德□
□□而崇祀之匪直爲子弟在學之故誠被公德澤之深
則然耳徵公之勤於政也教在養士政在愛民非予稔於
公□□□錄也是舉也肇於庚子秋七月落成於辛丑夏
四月公名丕顯字憲文號貞庵福建長樂人至如崇社稷
益道□□□荒歉建儲蓄拜風反火邑治以存八月不雨
虔禱輒應皆事之當記者別有遺愛亭攀轅圖備矣茲不
贅

温州府經歷署永嘉縣事王用賓 典史王欽

永嘉縣訓導朱孔章

鄉宦王澈金雲鴻項喬等二十五人姓氏不錄

嘉靖二十年辛丑夏四月吉日立

右碑在縣學西文昌宮林南峰名廷璫碑有缺字蓋作
書院而合祀林李二公故碑首題龍渠書院祠記

遺教堂碑記

賜進士出身奉政大夫南京刑部湖廣司郎中郡人侯一
元撰文

通議大夫太常寺卿兼司經局正字郡人清泉周令書篆

文王旣沒而有孔子孔子垂統百年而孟子私淑戰國間
至今學者宗之言六藝百家折中於孔孟矧鄒魯親炙之
者乎吾郡自漢以來有能紹正傳者靡得而聞已至宋慶
厯初王景山先生獨發明經蘊學者亦宗之當此時伊洛
則未作斯道學之初也繇是周行已劉安節安上三先生
輩出皆師事兩程氏及諸儒繼興文學始彬彬焉庶幾與
鄒魯齒予生去慶厯五百年讀諸君子書愀然想見其人
迺若覺山公余則幸聞覲其道願諸生親聆講誦習絃歌
音矣迄今默默如有所亡嗟乎古之人貴親炙有以哉君
名垣字峻之別號覺山姓洪氏上祖菊坡翁尋繹聖學公

潛心聖學益力登壬辰進士爲御史抗疏廷論往往忤權貴以故補二千石吾郡莅郡爲政以德慨然知治道之所以然乃向學者不深惟其脩正顧負俗而習悖乃喟然太息曰學校者風化之原也今士習漸靡卽民氓何觀於是進諸生語曰此邦稱小鄒魯迺自古紀之矣若知所貴乎鄒魯者豈不以其有聖賢之化而好禮樂之用哉諸生對曰然然則子諸生不遵鄒魯之業其何以崇鄉黨肅政教而興禮爲郡邑先對曰夫子不棄諸生之不肖使得至前此天之所以玉諸生也願請列弟子座惟夫子命之公許之於是定功令與諸生約曰日以朔望後一日會諸生公

宇中既會則引諸生隅坐以次起質疑義公循循爲推說
不倦久諸生各進一編編其所欲言公又人爲條答各如
其意所欲出首列古之仁聖天人之說而徵之當世之務
其要歸於心事之辯詳矣不可勝紀語具問答錄中諸生
簞貧者公捐俸祿給周之往往毀淫祠爲肄業所他卽家
事微瑣有所牴牾詣府中前膝下與之商確其交如家人
父子然得諸臯者必使改改而從我游者卽信不復疑其
誠如此弟子自四方至卒業者甚眾迺公疏終養行矣諸
生垂涕曰天平獨不可強留我夫子乎於是相率挽舟江
心而爲之亭公旣行則繪像鐫石爲堂三楹而題之曰遺

教或曰治郡教非古先舍之可耳噫甚矣治道之衰也彼孔子攝行相事孟子齊卿時而弟子依依在門誨之不倦何耶余又聞公之爲治晝夜盡節勞心甘淡薄秋毫無取衆職稱理功效卓然若其歲凶平糴務在拊循小民損有餘以贍不足原其所以爲粟者不能無罪至案誅衡擊之徒其時爲撥劇整亂不可察不可廢也論者猥以粟不當平遺□□卽有一二公何心哉公之行也老壯數萬人遮道飲泣閉關留行亦相奉立亭鑄石到於今見思古之遺愛無以今獨□□□二千石教愛並臻而竟傷於傳致之文其文足以成公之過雖以聖明在上諸諫官推轂

其後公獨隱約在明夷之貞□諸子今日著諸石以垂經紀者矣

嘉靖二十一年孟夏吉日温州府知府吳瓊 同知鄭□

□樂清縣□□□永嘉縣彭應麟平陽縣高□□

右碑在江心寺西塔下謝公亭後碑之陽爲洪公畫像汪昇墓誌銘

賜進士第江西吉安知府前兵部武選郎中致政郡人蕩

南朱諫撰文

永嘉樂梅汪先生卒乃孫守愚請銘於墓嗚呼知諫者先生也銘先生之墓非諫而誰諫少時讀書於墨壠朱先生

所常從先生游資啓發者居多距今五十餘年矣而交情如一日嘉靖十一年冬訪先生於玉山草堂留再宿而別先生自以年高嬰疾恐有不虞者以題主銘墓見任諫悲且頷焉不一月在楓林得先生訃音回哭於靈次乃孫守愚復伸先生臨別之意諫曰此夙約也安敢辭按狀有汪氏之始祖諱暹者自信之玉山徙溫之南溪菰田後自菰田徙居今霞山諱遇龜者霞山始祖也至樂梅先生五世於茲矣先生性孝弟倜儻尙義乃父耿菴公病篤沐浴顙天以求代卒而盡哀士夫爲之作霞山鶴怨章以識之長兄允質早亡遺孤尙圃且幼先生視如己出教育成立富

甲二鄉一日先生以役事在城仲兄允盛感疫卒於家匍匐而歸卽不敢入私室寢臥於喪次俗忌凡疫病之喪不舉哀先生率子弟朝夕奠哭於是遠近皆來吊謂大小宗不立無以爲報本之地乃率衆哀材以作二祠規模之宏敞儀節之悉備皆先生之經畫也脩譜牒別宗支而服屬以明隣里有爭訟不願之官就質於先生一言而決郡守文公林立族範選爲族正縣尹汪公循舉鄉約立爲約長郡守陸公鼂舉鄉飲延爲大賓自七十以後杜門不涉世事惟教子孫朝夕弗忘長孫愚自離懷抱育之膝下及長延師教以舉子學冀有以大先生之門近所居結書屋扁

曰玉山草堂多植松竹爲遊息之所積士夫來往詩札爲一卷曰不易集蓋取諸梅溪云故人寸楮隻字不易得之意名之也晚年得手戰疾亦未嘗釋卷先生處家處鄉以禮以義歷歷可紀予雖相知之深亦不過舉其大槩而已配安人珍川朱氏仲彩公之長女側室三謝氏陳氏謝氏皆能奉先生以忠誠惟謝氏阿奴尤貞孝之篤安人生男二長尙禮次尙蘊尙禮讀書好古而能詩有雪軒稿藏於家娶珍川朱氏御史公暹之孫女也生孫男三長守愚次守愆守心守愚口邑庠廩膳生娶總督盡忠劉公之女尙蘊初娶吳田葉氏繼娶東村邵氏蒲岐崔氏生男四長守

古葉所出守魯守田守孤崔所出女一適石柱王元領曾
孫男九蓬生芝生嵩生□生城生雉生雅生稚生豹生安
人朱氏先卒於嘉靖丁亥七月五日葬李與先生諱昇字
允遠生景泰辛未十一月三十日卒於嘉靖壬辰十一月
二十日享年八十有二卜以嘉靖乙未十月二十一日葬
李與朱氏合窆焉 銘曰

弗彊於時 乃表於鄉 天錫壽祺 惟德是彰
岡原繚繞 松柏蒼蒼 哲人埋玉 有耿其光
賁於短碣 燭於星芒

嘉靖乙巳仲春吉日立

右碑在相溪李奧

汪芮墓誌銘

□□廬州府六安縣學正姻人朱勝撰文

吾永嘉南溪隱君子曰友筠先生乃耿庵公仲子也予從祖姑配耿庵公生三子長允質早世次卽友筠諱芮字允盛季卽樂梅先生允遠也予髫時聞友筠樂梅二公爲耿庵肖子蚤有鄉曲之譽欲造其廬而問之未能旣而落落仕途而鄉先生俱物故嘉靖壬寅仲秋休致家居友筠公仲子尙義持狀謁予請銘於墓□□事歎人生出處會晤俱各有數不覺愀然淚曰勝雖才淺而義安敢辭按狀

先生曾祖諱琛祖諱益父諱琦號耿庵奕世載德自菰田徙居今之霞山凡五世於茲矣先生倜儻豪逸脫畧世故性孝友與其季允違事耿庵偕予祖姑以孝聞生則色養沒則致祭事必躬爲之性好飲飲必至醉乃休性好歌詩而聲出梁屋間謂大其族必先昌其材子弟不材族之所由弊也於是與其季樂梅公謀曰必延明師以主家塾然後師道立則善人多也時則秀才朱墨癯黃□□□石□處士趙文夫劉亶輩相結主家塾而先生□館穀朝夕相與講明義理而後生子弟彬彬知禮讓者數十人皆先生造就之功立大小宗而祀先有其地脩譜牒而族屬有所

敦至五十別構新第於舊居之東不忍其季樂梅公旦夕
之不相親又爲規其地於新第之東相與哀村鳩工欲其
甫□□共□□棣萼詩酒之娛慨道路□窄乃居者之恥
又竒其□貝二□□開闢坦坦周行跨越二里皆先生與
其季之力也先生不畏強禦不侮鰥寡平心率物不妄取
與叱咤啗啞間而遠近懾服不幸天不壽德卒於宏治辛
酉五月二十五日距生景泰丁卯七月十有二日享□五
十有五配安人東村邵公言之女先卒生男一尙廣有□
慧樂梅公最所許可亦早卒娶邵氏生孫男二守白守真
繼娶安人亦邵氏生男二仲卽尙義自幼有成立志凡友

筠先生有所舉動卽順意奉承不敢後而先生最所愛悅
娶碓石潘氏生孫男四守恭守忝守忌守參次尙耕好讀
書吟詩號林泉亦每有佳句爲士夫稱賞娶珍川朱氏生
孫男六守命守公守僉守今守龠守全先生側室詹氏生
幼男尙堉類先生有剛氣未及冠而先生卒而繼以勤儉
不敢廢先生之業娶洪川陳氏生孫男一守昊女二長適
鶴洋謝玖次適東村邵凱曾孫男凡一十四人平生鄒生
教生敕生馴生端生望生篤生侃生培生軋生卽生元生
堂生皆先生厚德之所遺也先生葬於宏治癸亥十一月
二十日附於李奧祖壠與安人合窆焉 銘曰

德不滋壽兮而滋其性 道不裕時兮而裕其後

清風明月兮游魂 蒼松翠柏兮爲友

嘉靖乙巳仲秋吉日立

右碑在柑溪李與

義堂處士朱遜墓誌銘

明故義堂處士朱公墓誌銘

篆額

賜進士資政大夫刑部尙書致仕姻人樂邑高友璣撰文

公諱遜字守廉世居永嘉柑溪之珍川始祖諱直清登宋

紹興進士厯官

缺

撫州高祖諱源曾祖諱誥祖諱觀父諱

瓏朱氏世爲宦族公之曾叔祖諱

缺

學正宗程朱之學所

著有四書述義從祀郡庠鄉賢至工科給事中良山缺史

暹桃源學正鼎皆從祖也今姪勝掌六安郡大博事仁風

扇揚上下瞻缺授弟腴一經祭鄉進士今尹鳳陽以廉能

稱其斯文相授非一日矣惟公缺真源浚之以蠲潔以澡

德禪身故能讀書好古澹朴溫恭孝以事親友以缺而樂

道特立而克和敦讓廉潔利欲不能遷其心榮祿不足奪

其志家饒缺構鑿池開圃植花養魚凡宗戚朋舊至者相

與壺觴杖履笑傲山水以樂缺處大率若此餘不能盡述

以正德辛巳七月十四日卒距生景泰癸酉四缺日享壽

九十有九配珠岸陳氏善治內婦道惟謹克相夫子男德

樞德

缺

號幽獨讀書談道孝悌恭謹敦朴冲和足繼前修

允

生追慕父母起蓋墓

缺

孝思創立鳶飛書院廬於其側

教生徒以終其身女一適鴻臚寺序班白

缺

之子珮孫男

冲窠歆鄧亥噴曾孫鳩埤外孫陳旦陳口女甥一適光祿

署

缺

子彳捷其葬在西竹園之山陽實幽獨已業友悌篤

至罔分彼此幽獨并

缺

氏壽藏附於墓側仍憲厥父之行

不昭於世託予志之予因公之甥與公

缺

公頗詳遂爲之

誌

銘曰 噫嘻朱公

百夫之防

追琢其章

金玉

口 缺

匪爵而榮

匪祿而康

生順沒寧

返於

真鄉

昭茲主器

欵爾

缺

永言孝思

下缺

嘉靖二十四年乙巳季

缺

右碑在柵溪珍川

朱樞墓碣

明永嘉朱氏幽獨道人墓碣

篆額

賜進士第刑部郎中樂邑姻人文峯金嗣撰文

達人不以死生爲諱者知人之有生必有死也死生如晝
夜相代謝漠然無所動其心如□□明先爲祭文杜牧之
預爲墓志功名富貴舉不足以嬰其念慮得是理矣求之
後世寧多見耶惟吾柵溪幽獨君能尙有之君姓朱氏諱

樞字公軸世居珍川迄宋以來代有聞望爲相溪之巨族
高祖誥曾祖觀祖瓏父遜生君幼穎悟比長倜儻好義不
吐不如所謂履道坦坦幽人貞吉君蓋有焉故號曰幽獨
且至孝善幹蠱堂構經營操持門戶內外井井而父母如
弗知也雅愛羣書尤善手錄如先世知府憲事御史諸公
及外祖陳君外父林君碑銘詩賦哀爲一帙目曰三族詞
章其篤於親舊槩如此先是先太夫人卒未克舉葬苦塊
奠哭蓋三年如一日焉□安人卒亦如之念外父母有至
恩弗食其報故於墓側立碑植木以爲久遠圖屢爲賦長
料□平允故得鄉人之歡心其於宗族尤盡恩意有弟博

士六安曰勝作宰鳳陽曰腆極受重口自其宦遊簡札往來不少置自餘名卿巨儒莫不嚮慕之者然君卒能削迹於權貴之門遊心於荒涼之境其林宗康節之流乎君嘗語人曰生寄死歸吾參之熟矣古人先得我心者耳於是買山一區預營考妣窀穸而錙銖不與於弟姪焉仍以己及安人附其旁若將以身養之者復結廬作亭於隙地種花引泉爲菟裘處勅斷世務坐臥其間唯朝夕拜掃以展孝思樂得卜養間亦酌酒賦詩陶寫情興人望之如冥鴻野鶴嘖嘖以爲不可及也況其盡倫盡性夫豈拘拘隱淪者擬哉配安人林氏端莊柔順能婦能母有可稱者先以

嘉靖癸卯十一月二十九日卒享年五十有四男四冲案
歆亥女一適楓林徐廩男孫鳩埤幼憚孥淺企貶胖狂外
孫世穀葬在本里西園之陽銘曰

鍾山蒼蒼 珍水泱泱 挺生君子 維紀維綱

孝弟天性 善洽其鄉 猗歟淑人 懿德孔彰

壽不滿湘 疇勿軫傷 窈窕立堂 西園之陽

瞻彼先塋 無間存亡 天錫之祉 後嗣其昌

鑑銘金石 百世垂芳

嘉靖三十一年壬子歲仲秋 日四百四十五甲子幽

獨道人立石

右碑在柑溪珍川此於乃父墓下預爲壽藏而乞文勒石者

重建東山書院碑

嘉靖癸丑仲秋既望

賜進士文林郎□差巡按陝西監察御史邑人孫昭撰

右碑在華蓋山雙忠祠前文見學校

七聖廟石鼎

明嘉靖甲寅仲冬吉日立

勸首祭戶薛守僅黃濱張一陽陳伯懋

右鼎兩耳缺在城西七聖廟內上層年月十字橫列口

上下層祭戶姓名四人十五字橫列頸上今置殿前貯水爲盥手器

永嘉縣撥補學田記

永嘉古名邑也立學儲材制焉按郡素稱小鄒魯於乾淳大都右文有典振作培養良有司之力也迨我

國朝以文教敷化規模概見宏治間前邑令廣東南峰林公廷璫鑿山拓址完建教所仍置田若干以助養育之所不給歲收其所入羨其所用至今人士思慕之立祠學宮血食無替繼官斯土者又撥新漲塗田以增益之皆作人盛典也迺者我大邑侯一石周公筮仕永嘉首興學校會

吳越海警武備方殷日多事公以長才涖之獄無滋豐寇
不入境再明年乙卯春都臺檄公統眾援嘉湖變公先聲
所至口口不戰歸則首夏境土息烽堠鳴琴化理文教聿
興頃大博方公克儉暨少博端公廷試徐公經上學政狀
曰賴長者修廟廡舉釋菜春秋揭虔夫子明倫有堂師生
有序廚廩有備近則東山書院之鑿結俾諸生有所仰止
棲修顧學籍舊額有塗田凡以前人裕諸生類也以今爲
風潮所衝坍豪強兼併請以爲念一石公惻然曰此真令
職也爰謀諸寮專任尉莆田賓峰鄭君德儀司其事秉公
矢心督同耆民陳嵩陳獻等勘得三十三四都浮塗田數

公適都邑士民向以攔護爲己有者用以理論之曰昔文正公讓宅爲蘇學雖以秦會之在溫尙舍財置學田況塗漲無主之物乎顧與庠養士競衆媿奪輸服讓所有得撥補計亏口如干得畝百九十二有奇以足舊額於是諸生每月考廩餼之外有餘供及百凡公費饒所辦無匱大博公偕其憲弟子期傳久相與礱石勒厥績記屬廷松曰興理範民而學迺其器也古上庠之設燕食以豐士用作勸時登康乂卽其效 國家養士百八十年於茲濟濟藹藹策名科目勲業有光今觀南北辟雍之設聚天下士極其腆禮外而州縣有庠亦賴是士豈徒然無所報效哉令之

於民有父道焉有君道焉有師道焉休豫生息曰食曰教
咸萃其責於一人士爲民首也待之以厚儲之以豫拔之
以正三者備而士氣作政之上也昔董子謂古之天下亦
今之天下余謂今之永嘉亦古之永嘉又何乾涸之盛不
可復哉邑之有令如公且南峰不得專美於前矣後之視
今猶今之視昔也他日撥補執此爲例云抑又爲諸友勸
曰有司之厚我者如此所望於我者何如諸博公亦毋徒
曰吾爲諸生侈興隆遇而已益砥礪而成其美不亦韙哉
是舉也一石公主其事丞紫峰王公一巨簿竹溪龔公耀
樂贊其謀者也賓峰君實與有力焉法得并書一石公名

岱字子口以進士起家直隸揚州泰興人也其先後塗田
之數別紀之碑陰 皆

嘉靖乙卯冬孟月哉生魄

賜進士第中奉大夫山西左布政使郡人俟齋趙廷松頓
首拜書

教諭方克儉 訓導端廷試徐經同立石

右碑在縣學二門右嘉靖三十四年立

祀先賢儒志王公碑

皇明嘉靖己未春正月吉日

賜進士第中憲大夫知溫
州府事閩中鄭銘撰

右碑在華蓋山舊東山書院前文漫漶過半不錄

卓公祠碑

焦竑撰

右碑在江心寺卓公祠內萬厯元年癸酉立文見壇廟
蕭廩江心寺詩碑

九鼎當年繫一絲荒山繭足亦何悲兩間正氣須還我萬
古顏綱更付誰賸與江山留勝迹幾因夢寐見心期瞳瞳
海日來孤嶼似送胥濤擁故碑

蕭廩

右碑在文信公祠蕭廩萬厯初年巡按此詩步信國原

韻草書

江心寺復香燈田碑

侯一元撰

右碑在江心寺西峰下萬厯三年立文見孤嶼志

巽吉山建塔記

賜進士中憲大夫都察院右僉都御史巡撫貴州兼督
湖北川東等處地方提督軍務永嘉竹巖王諱撰

溫之爲郡層巒危巘屹布四維中有九山形如北斗城據
斗魁餘爲斗柄爲輔弼而巽吉山在城南三里所則兩校
之應案也山巔舊有塔堪輿家所謂文筆峯也爾時民安
物阜而科第每得高等歲久塔就圯卽人文物產不逮往
昔或者歸咎文筆之廢每請復於當道時則倭寇甫盜財
賦亦訕未可舉贏也萬厯元年聖天子軫念海邦簡昇賢

守我洞岳陽公以名御史來知是郡是郡吏弊民隱夢不可詰公先以正己卽覈賦額剔奸蠹舉廢墜清刑獄而尤加意於學政於是士民復以建塔請公唯唯旣而侍御鵬峰吳公督學少松滕公按部知士民之汲汲於是也允其請洞岳公遂下令曰願助建塔者聽先是甲戌歲郡大水己亥苦饑公亟發廩勸分動中機宜民賴安殖歲隨大稔聞公令咸歡呼競勸不踰月糴穀數千石適兵憲春所龔公分岳笠洲王公至鴻猷雅度嘉惠海方語次贊之公曰今時則易然矣乃拓故地分財用量功命日以興事公捐俸爲僚屬倡士民從而助益之而永嘉徐丞浩董其役經

始於乙亥十月告成於丙子六月塔高十一丈八尺圍四丈八尺下爲塔院奉祀文昌神南向前卽松林爲魁象亭其東緣厓爲磴路路首小坊扁曰跨斗躋雲豈惟登高攬勝抑可觀風省稼也山麓有三元道院爲每歲迎春發軔之所則仍舊加葺院之後故有白玉蟾駐鶴亭及少保黃公碑記已廢圯并脩復之山川景象煥然改觀而費不及公役不知擾誠所謂悅以使民樂事勸功者矣非公才猷宏綽德政孚洽志慮真切安能笑談顧盼之間頓舉百年之墜緒而成一方之偉觀哉昔晉郭璞卜城時有云去晉千餘年地氣始旺茲非其時會耶諸君子之至於斯也遠

望吹臺大羅之聳特則有高明振拔之思俯瞰江光湖色
之澄鮮則有滌蕩活潑之思旁觀花木交輝民居繡錯則
有經緯財成之思登仕者增修其善政未仕者勤習其本
業必使處無愧於江山出無愧於科名由是而謂茲舉之
無助於斯人不可也或徒恃堪輿家之說而不知奮修其
人事則豈當道作新之意又豈有志嚮往者所以自待哉
兩庠師生屬余紀其事故推公之意列於石以示將來公
諱邦憲字肅卿楚之巴陵人口口口口口於時府倅俞
公日強李公純智節推官公賢永嘉劉君三宅主簿仰傑
典史汪木府縣學教授高任教諭章時通訓導許符耿光

邵忠冒承禮蔡澄虞周皆嘗協贊其事而樂觀厥成者例得并書云

皇明萬厯四年丙子秋七月吉旦

右碑在巽吉山塔院

郡守楊公生祠碑

侯一元撰

萬厯丙子秋我郡伯洞岳楊公又當入

覲於時蒸庶雲

集咸垂涕擁車轍下旣莫能留則曰

天子矜我民公其

當復來越明年公遂讀禮歸衮衣弗復東人結思於是士

民迺相與卽巽山之麓爲堂三楹肖公而生祠之歲時瞻

禮如見公焉日以抒吾思謂某宜紀諸石惟公殆所謂異

人哉秉心而忠孝一酬物而左右宜蒞治而威愛兼曩爲
南臺御史埋輪射隼風采凜然及爲吾郡則弛栗而溫又
藹然仁人長者然公冰蘖自持廉則生威衡鑑中懸公則
生明狡僞獻誠人自不欺非惟不能亦復不忍其始至也
蓋未匝月而民化之迺公望雲之思獨在王母太夫人則
遂一日棄其官去當道以民故遮留居一歲入覲卽又上
書陳情民亦又上書留公於是 天子執政其重公敦勉
之而太夫人以公之身在 社稷也亦欣然就養焉公出
則拊循赤子入則承歡王母四載之間深仁厚澤滲漉五
邑大畧以民生莫先於食也每枯旱輒苦身露禱吁嗟雲

漢淫潦則胼胝排決安集昏墊告饑發廩常不待報歡分
來糴未嘗強民而菜色咸起豐穰洊臻矣以均民莫先事
役也迺悉歛版籍選擇耆艾閉之官舍核實弊漏於是丁
田足額民免虛派因爲格目昭示人人而碩鼠害去民歌
畫一矣以足國阜民莫先貯積也迺一日勾稽倉糧得侵
米千四百餘石按詰守藏得假印冒支銀動千餘兩及隱
沒軍需硝黃亦數千百斤皆應時輸補盡伏其辜而倉庫
一清公私有恃矣以訟獄者教化所寓也常刻肌而形子
羔之色辨璧而存朱公之厚明弗察於淵魚仁或觀於市
衣諸如此類不可殫陳蓋自公至郡務以靖民未嘗有一

人追胥下鄉鄉民一聞勸粟卽委輸恐後動數千石義倉
儲焉以其誠著金石明燭秋毫故吏胥則惕惕若懷冰民
庶則依依如負襁惟脫巾之士咸服廉威蓋軍餉故有出
入公一以原封士飽實惠惟所指麾於是披恬海上草茂
園扉禮樂可興鼙鼓斯鳴泮宮旣葺下至陰陽醫學里間
綽楔莫不煥然一新而民不知勞官不知費焉惟茲異山
塔者故所建以爲黌宮文筆者也諸生以爲言而難其費
公從容指授取諸荒穀之贏擇廉吏得徐丞浩俾督耆士
朝夕於山遂以旬歲之閒而復百年之緒於是文昌祠焉
公亦次焉豈偶然哉夫庚桑社稷甘棠勿剪在吾郡者非

一矣乃民獨指慕東園何公於今則前柱史龐公與公三祠已爾而公之在治亦甚慕何公特樹坊以表之所謂有而似之者也蓋何公位至冢宰猶親吾郡常稱曰我溫民及躋上壽嘗曰吾他日神有所之吾之溫矣以此推之公將無位其位而心其心乎哉石殆不足爲其永矣或曰祠公並龐公何也曰龐公首立均平法蘇吾民而公則善守其法亦猶蕭規而曹隨者也曰祠之有田何也曰爲祠者子來則有餘貲以之置田將以葺祠而永之也嗟乎亦可以觀民心也已公名邦憲字某楚之巴陵人

右碑在全真觀石膚剝落殆盡僅存數十字文據二谷

山人集錄八

張孚敬墓誌銘

明光祿大夫柱國少師兼太子太師吏部尙書華蓋殿大學士贈太師諡文忠張公神道碑

明興熙洽景運追順化宏德閒愈益嘉邕醞隆益勃勃蒸蒸口宣溢鍾縱不世出之至聖以議禮制度考文於斯際而表卓犖偉麗之績爲千聖宗臂之神龍驤霄卽滄溟嶽麓噓雲滂附於戲盛哉誕維

世宗肅皇帝肇服江漢續膺 寶錄躡跡唐堯暢然有整齊宇宙恢廓典章之志時則有若太師張文忠公應期而

出蔚然名世若聘莘載礪契券口曠生隆眷倚歿永令謚
蓋觀公之爲輔而

世宗之所以用公者誠近古鮮儷哉公諱璉字秉用別號
羅峯世爲浙之永嘉人旣輔

世宗相得益章爰 賜名孚敬字茂恭又時時召對手敕
皆稱曰張元輔曰張羅山而不名曾祖轉寶祖敏父昇
贈少師兼太子太師吏部尙書華蓋殿大學士視公官曾
祖妣王祖妣徐妣高陳謝俱 贈一品夫人公實謝夫人
出也公生有異質年十三題詩以臥龍自許弱冠遊鄉校
督學使者驚其論曰此子異日不特以文鳴世立朝氣節

殆不可量舉宏治戊午鄉試益銳志天下國家之務屢試
進士科不第築書院姚溪山中聚徒講學從之遊者日衆
正德庚辰中會試放榜之朝有五色雲見越明年辛巳試
大廷實

世宗龍飛臨軒第一制策也公得 賜進士出身是時方
大集廷臣議所爲追尊

獻皇帝禮閣臣禮官援宋司馬光濮園議上宜考

孝廟而叔

獻皇帝公獨抗疏數百言力斥其非大畧謂

皇上奉

祖訓兄終弟及乃繼統非繼嗣法不得與爲人後者等宜崇徽號所生如周王太王王季故事疏上

世宗親覽曰此論一出吾父子可終完也而羣臣內倚昭聖外黨成議羣擊排公壬午授公爲南京刑部主事實外之也甲申公以大禮未決再上疏言益切

世宗大感悟立召公赴廷議遂擢翰林院學士議者益聚訟比及三年三降詔書訖未畫一公奮然曰此萬古綱常攸繫欲襄

聖考敢勿畢命竭愚忠邪援經據禮旁引曲證前後又數千百言根情極理而異議始詘乃更上興獻帝曰

皇考恭穆獻皇帝 興國太后曰

聖母章聖皇太后克正厥名成典禮焉於是

世宗雅眷意公謂公可砥柱天下事立奇功乙酉陞詹事
仍兼學士丙戌陞兵部右侍郎隨轉左兼學士丁亥進大
禮要畧 命開館纂脩明倫大典 敕掌都察院事頃之
進禮部尚書兼文淵閣大學士入贊機務公居臺署弗逾
時而條陳釐正井井縵悉中外振肅是時

天子益勵精計治而公矢志靖獻知無不爲清政本杜請
謁重制誥平潞賊定服制又應 制陳言曰審幾微專委
任惜人才求居隱申憲綱正

郊祀耕籍廟街諸議皆關繫 國家大體統大興革事悉見 嘉納 詔所司舉行中外拭目觀太平云往者逆豎雖除而公黨餘孽尙有依城社覬竊柄者公不動聲色徐以計除之各藩鎮守太監尤倚勢擅威福殘剝流毒累數十年莫之敢議公入告

世宗極言其害一日悉召還內仍罷所歲貢珍異海內欣欣更生若驅虎豹而家室之也

二祖迭建

太廟規制猶未盡合古公議采周禮王制建

九廟本專廟都宮及昭穆並列世室特建之義又更創

世廟以專祀

獻考皆奉 手詔命禮官遵行如制國家孔子之祭祝號
猶襲稱封諡公言非古也且非實能知尊孔子者請易大
成文宣王之諡特稱至聖先師孔子易殿以廟易肖像以
木主一時毀聖之議蠢然四起至有投効去自爲高者公
持正論益堅不爲撼又爲定其配祀邊豆鬱尊樂舞品式
建啟聖祠定配頒行國學暨天下郡縣

天子爲之皮弁服謁拜行釋奠禮於是千古陋風一旦赫
然丕變而吾夫子之名益尊道益重

聖朝隆師之禮益卓越無以尙戊子加少保

上享太廟回公侍道側

上頻顧公賜詩褒美尋加少傅兼太子太傅吏部尚書華蓋殿大學士給四代 恩誥廕一子爲中書舍人已丑奉命主會試崇雅黜浮士習式正一時錄士率彬彬卓立而文章氣節裒然舉首者人至今稱之是年蔡夫人卒京師 溫旨慰諭 勅有司祭葬續室潘夫人

上爲遣中官賚 賜妝具羊酒金幣襲嘉禮庚寅以災異乞休壬辰召兼 太子太師 賜第長安門西兩者旣恩故事未有也癸巳晉加少師再給四代 恩誥贈封如制乙未兩考 賜勅獎諭復廕一子如前官移疾屢疏乞致

仕 詔行人中使視藥餌護送公還上念公弗置丙申
詔問公疾且趣入朝至處州疾作不果行再 詔趨至金
華疾又作遂歸臥不起己亥

章聖皇太后哀詔至澍公時已疾病強起成服慟哭疾益
革以是年二月六日薨於家嗚呼公爲人臣可謂事君以
忠且盡禮者矣距所生享年六十有五時

上幸承天訃聞震悼輟視朝一日 賜公太師謚文忠廢
一子爲尙寶司丞遣官致祭視葬賻卹有加配蔡氏繼潘
氏俱封一品夫人子男三長中書舍人遜志先卒次尙寶
司丞遜業次中書舍人遜膚孫男三汝綱光祿寺監事汝

紀官生汝經國子生公事

世宗幾二十年所獲 賜制勅御劄銀印記圖書冠服金玉帶書集繪幣蟒衣侈盛一時子孫籍其數存於家 賜

御書名字暨 御題

皇考手澤榮恩堂在京師西長安第 賜建寶綸樓一品

家廟在郡城 賜建貞義書院抱忠堂敬一亭在原籍姚

溪所著有禮記章句杜律訓解貞義書院集羅山奏疏羅

山文集金滕要辯大禮奏議大禮要畧正孔子祀典郊祀

議諸書余嘗厯數 國朝名公大老至張文忠公則未嘗

不鵠肅歛容歎久之公真所謂矯矯人豪死而不朽者哉

公孝友忠義植性自天剛毅嚴凝望之凜然而氣魄力量
蓋一世心事光明無城府鱗甲蚤失恃事父以志養仲兄
死收育其三孤嫁其一女凡宗之貞女能長鞠遺嬰者必
捐貲衣食之平生不忘言笑見有司刑政不平侃侃風刺
義形於色

武宗南巡封疆臣不知翠華所止而當路有招公遊雁蕩
者公以詩却謝之曰海內衣冠集鴈山艸茆無路得追攀
山中定掃豺狼道天下誰當虎豹關玉輦胡從瞻樂地金
尊未許破愁顏江湖廊廟心相似莫道漁樵盡日間蓋致
身許國慷慨大節素所負如此方

世宗寵異公時卿貳有欲厚自結者內金罈中題曰黃精白蠟敬壽公立暴其私朝士悚栗與渭厓霍公同心議論閒有不合輒大爭歸於一是則怡然解已數爭數解無纖罅而霍公後護其遺孤尤力嘗密疏薦夏公夏報公薄甚公弗言非

主上宣諭於公歿之後舉朝莫有知者茲皆古大臣之風也嗚呼世有雄才大畧如公卽少年談笑取一第何難顧迴翔南宮二十餘載蓋天將以公授

世宗共懋不世出之烈故俾之際飛龍之會一旦鴻毛順風巷遇奇特今觀夫大禮一議繼文武周公斟酌未盡之

典而孔庭之祀則漢宋以來大傳莫有發明者其他皆人臣所不敢言不敢爲而惟

世宗爲能信用公公在朝審諤孤特中立不倚所持必國是事

世宗無所從諛至大饗升祔之議公持之尤力終其身竟不果行難進易退凡四召起四乞歸而眷遇益隆嗚呼蓋世宗之所以知公者至矣君臣相得天之所啓人詎違之嗣後輔臣鮮當

上意而

上亦愈深拱立思坐運四海故論者上下嘉靖始末之治

於文忠公有永嘆哉有永嘆哉公以薨之明年仲子遜業
奉 敕葬公杜奧山中迨今三十餘稔矣而公之仲孫汝
紀以墓道之碑乞銘言於禮禮實公己丑所舉士公時以
薦賢爲公不欲桃李自私戒諸士不許脩弟子禮諸士亦
遂無復執雉門下者終公之世未嘗一奉顏色故於公懿
行徽言末繇觀記今所載惟表表天下人共知而傳者俯
仰知己感慨冥冥顧又幸竊以卮辭附貞珉庶幾聞讚
昭代君臣盛際若烝民江漢之詩亦匪直以報所私云銘
曰烈烈文忠帝佐臣師佑我

世宗萬邦作儀有崇帝號匪曰 帝私正名萬古天秩之

葬於穆清廟虔制考古

列聖在天維篤周祜大哉尼父文宣冕服典祀孔釐嚶鳴
喬木旣旣璫貂虎踞鯨驕韓公出敕蜚歛霾消 帝曰女
嘉女貳兵曹女視總憲女肅百寮文淵密勿學士參之漣
漣絲綸少師掌之端笏儼綬謹訐可否 帝議國士弗回
弗疚惟 帝念哉遇若納牖爰賜銀章明良載揚爰賜圍
帶玉燦琅琅有煌 宸翰龍髯世澤賜構宇堂暉暉翼翼
公在姚溪天眷實速公在廊廟勇退急流存也榮遇歿兮
芳休華表峩峩佳樹蕢蕢瞻公之封想公之勲玉堂青史
鴈山白雲

賜進士出身資德大夫正治上卿都察院左都御史侍
經筵前戶禮刑部尙書門人德平葛守禮拜譔 吳人周
天球書

右碑今藏如園張氏

新建浩然樓記 劉東星撰

永嘉控山帶海形勝甲於東南而江中孤嶼最奇嶙峋壁
立橫截江流驚波怒濤瀾漫震撼屹然不移有迴狂瀾而
障百川之勢忠臣義士值死生患難之衝不疑不懾中宇
宙而獨立以身負綱常之重者似之其上爲江心寺兩塔
並峙高插雲漢寺左有堂翼然名曰正氣則宋丞相文山

公之祠也公嘗航海求二王信宿於此甌人至今仰之世崇祀祠前有地若干步俯瞰江流尤曠絕可喜嶼中稱最勝焉憲長吳君韞菴建節海上民和兵戢時薦謁祠下周迴四顧喟然歎曰是宜樓以壯觀瞻乃始經度定基出資構材郡守李君際寅贊其議而郡丞劉君正亨督其成閎敞爽闡與其地稱而名之曰浩然蓋取文公正氣歌中所稱孟子浩然之旨云余校士至甌瞻拜祠下吳君因觴余於樓而屬爲之記余曰東南之名勝豈獨永嘉而永嘉之名勝豈獨一孤嶼哉惟文山公成仁取義不以顛沛流離易志此其大節挺立名與天壤俱畱故所過之地山增

高而江增深有不在於形勝之間者且樓又當公祠前巍
峙特出擁翠飛丹真是上接太清而厯覽無際名以浩然
不亦稱情乎哉登斯樓也俯仰乎江山之秀而想見文山
公之忠義則烈烈轟轟之氣當有不亡者存而激頽立懦
盜無獨秉浩然之全植綱常撐宇宙與文山曠世而相感
者出於其間乎然則是樓之神益於世教大矣若夫魚龍
煙霧之出沒風帆沙鳥之往來上下倏忽變幻獻異於窗
櫺几席之間足以侈眺望而供吟嘯則騷人墨客或將取
之而非吳君所以建樓之意也經始於庚辰仲冬落成於
明年正月吳君名自新祁門人登戊辰進士

右碑在孤嶼文丞相祠前

文丞相詩碑

宋文丞相宿中川寺詩

萬里風霜鬢已絲飄零回首壯心悲羅浮山下雪來未揚
子江心月照誰祇謂虎頭非貴相不圖羝乳有歸期乘潮
一到中川寺暗度中興第二碑

萬厯九年劉正亨書吳自新立石

右碑在文丞相祠

張佳胤江心寺詩刻

江心寺

一水中央寺並浮客來五月只疑秋鰲簪雙綰陽侯髻蜃
氣高懸海若樓孤嶼陸沈天地事大江潮接古今流東南
名勝探將遍漫說金焦在潤州崑崙張佳胤

右碑在浩然樓下草書佳胤字肖甫銅梁人嘉靖進士
萬厯十年巡撫浙江

重修永嘉縣學碑

右碑在縣學二門內詹萊撰萬厯十一年立文見學校
重修漢東甌王廟碑

右碑在東甌王廟大殿旁王叔果撰萬厯十一年立文
見壇廟

永嘉縣城隍廟碑

萬厯甲申暮春旣望立

右碑在縣城隍廟侯一元撰文見壇廟

重脩永嘉廟學碑

右碑在縣學大成門內侯一元撰萬厯十二年立文見
學校

衛承芳羅浮山題字

硯臺巖

萬厯甲申大夫衛承芳淇水口巴東遊此

羅浮山下南畔有湖湖中屹立一石高可二三仞鐫硯

臺巖三大字篆書舊志稱鏡臺者誤也

天寧寺井闢

萬厯十五年丁亥孟冬十六日吉天寧寺立

重修巾湖葉氏宗祠碑記

夫祠者祀也祀之者思之也故古先王有事於宗廟振舉其彝倫敦敘其昭穆口於四時罔念水木本源尊尊親親永孝思於不匱而已吾族出自南陽支派口居湖之烏程建之建安歛之新安枯之縉雲其居松陽黃南曰公濟公者迺遷口爲東嘉巾湖之始祖也一顯於文定水心公繼顯於從弟文脩西山公水心公口於汀洲分真翁由真翁

傳岳陽僉判公由僉判傳温州路教授公教授傳

皇明大賓止菴公幹蠱克家詩禮垂訓五子二十一孫森
森濟濟具有矜式長嗣口公尙志不仕郡府列侯咸以齒
德尊之節致書招預鄉飲賓席季孫廷雲公文口安經府
纈嗣爾每錄郡庠雖未登名仕版可謂代有文人繩其祖
武僅守先聲口墜者皆宗祖在天之靈有以默相之也則
我後人廟享而時思之者豈容已哉口祇建以來年深就
圯裔孫雲鴻如槐等輩不忍祠之寥落慨興公舉籍祖遺
貲口重葺戮力董其事焉幸今堂廡改觀庶乎以妥以侑
儼然裕後之宏規也夫我口有百世不忘之惠我後人崇

報之典當有百世不遷之廟則斯祠之重葺而維□又豈
容已也哉善乎韓子曰莫爲之先雖美弗彰莫爲之後雖
盛弗傳美而彰□已作於前矣盛而傳寧不於後昆而深
有屬望耶敢鐫石書之以爲記 皆

萬厯戊子仲冬朔後三日郡庠生葉氏宗孫世英撰世新
書

右碑在水心祠行未尙有字陷入碑趺

大觀亭詩碑

大觀亭二首

春雨初晴吏事閑鹿城華蓋好躋攀萬家春樹斜□□百

雉烟村未掩關星斗侵簷隨座見帆檣近市口中休論
晉宋風流歇自有清暉山水間

洞天亭閣百花叢福地岩嶺紫翠籠九斗嵐光□□□滿
城煙靄有無中漫從宦跡追康樂乞得□□□□□山海
高深聊載酒振衣長嘯對鄆筒

萬厯丁未孟夏月吉日

賜進士第亞中大夫浙江右參政楚人車大任題

右碑在今東山書院門內碑陽刊巡道芮復傳大觀亭
記而以碑陰面壁故遊者不知有是詩車大任見浙江
通志

建五靈廟碑記

賜進士第文林郎知永嘉縣事同安林應翔撰文見壇廟
萬厯二十六年歲次戊戌仲秋吉立

邑侯林公建五靈廟碑記

今之稱吏治者彙墨守人事循常之爲斤斤至民神雜糅
禍災薦臻輒謝以胥嚮玄渺未聞越非常之原爲元元祈
嚮之壹何拘也語不云乎禮以義起日有其舉之唐昌黎
痛斥佛骨亦曰凡夫神降依貺庇斯人者皆愈所當致誠
親祀於廟者也卽我

國家釐口諸祀自岳瀆山川社稷之外爰及爲厲亦有壇

宇矧明神之尸禍福能機祥斯民者乎噫噫非忠實心一意民羸者孰取曠典而舉諸甌土歲苦疫骨肉相捐吾

師同安林負翁以名進士製錦吾甌兩朞之間慈和淵懿登理胥庭猶然噉噉陰衷痼痼彌切時進父老詢民疾苦惟是瘟疫腊毒甚乃循故實如桃茢之祓上池之飲酪胄之掩日脩舉而日呻吟也廉其狀則有非常之物瞰於室而馮於躬如曼倩所罵文考所夢者曰異哉是爲五行沴氣其神自隋迄今代操罰惡禍淫之柄取精多而用物宏矣怒敎我祀肆厥馮陵奈何吏茲土者口實非族之嫌鯁鯁焉口一方請命造無涯福乎謀及諸老薦紳卜地華山

麓天窻之陬端祠祀焉鳩工庀具崇基厚垣卽營度枝梧
出自薪俸贖鍰非有金碧巨麗丹口燿侈人耳目而其門
異如其廡奧如其堂廓如望之有清淨軒朗之象足棲神
妥靈已祠成侯率吏民以春秋致禱或祈實或舞雩肆獻
裸享口口靡魯帟歲而滯陰散陽爲之序次天晷札遘人
不一見方且風雨時至嘉生繁祉人民飭利侯入 覲再
借寇父老數十百輩迎遮鵠首歡呼謂曰侯生我羸瘵真
賈父哉遂伐石樹碑以詔來茲而以時爲侯門下士睹祀
事始末爲悉宜有一言口口侯德夫祀國之大事宜考信
於古禮禮稱能禦大災則祀之能捍大患則祀之民之災

患孰大於死亡相藉敦倫傷教也者而神之捍禦孰大于
□生死肉骨仁壽一世也者彼浮圖駕空鑿虛尙能以劫
灰輪迴福田利益之說瑯宮梵宇相望埏垓以神之福國
庇民應若眉睫豈其民泯泯汶汶□象尊疊之享甚爲執
事者羞之故聰明正直者神也赤城白□神明合德者侯
也非有實沈臺貽之感非有羽淵爰居之誣非有江漢雖
□□之越第以孳孳軫念泮溟潛孚道而得神祭而逢福
理固若左券哉時獨以幽明神人總歸一理政之腥臊崇
則已作侯自下車以來祓除其心明信其德弗屑屑於察
淵投巫而聞左銖兩之孳發摘殆盡諸如錢之神社之鼠

竈之君熬之博屏跡喙息馨香之薦固已身爲政矣試卽
洪橋之口風滅火神鑪之載浮重淵此詎裨竈瞽史能乎
哉頃者江以南亢陽千里獨侯露禱甘澍立沛河潤四隣
天且不違神於何有時思後來者神神功而閭於神侯德
也因父老之請而追本論著之并以迎神之詞刻於麗性
之石 崇雲構兮幽宮結朱霞兮雄虹導五鷺兮先路
駕吾乘兮騰飛龍靈之來兮裔裔儵連蜷兮神哉而口悠
長劒兮擁明彗廓游氛兮驅沴厲奠桂酒兮折瓊芳疏緩
節兮陳浩倡德孔熾兮民豫康嚮皇皇兮保無疆

萬厯二十六年歲舍戊戌孟冬穀旦

鄉進士邑人張時叔相父撰文

重修表忠祠碑記

賜進士出身大中大夫福建布政司左參政郡人王叔杲
撰

我國沿海而郡島夷出沒相望 國初武備戒嚴關隘烽
堠唯謹承平日久防禦漸弛兵不習戰者垂今百年餘嘉
靖甲寅倭嘗寇瑞安之□□□□劫而去自是歲以爲常
撫臣奏請設海防官以郡丞專其任誠重之也先是後谷
黃公來貳吾郡□□□□丕績茂著六載攷成薦剡迭上

將不次擢矣適丙辰夏倭擁衆突至報聞諸司錯愕無策
公躍然起曰口口門庭且內闢蹂躪我奈何緩圖哉遂挺
身帥兩武弁誓師而出遇賊於平陽之水北公冒矢石短
兵督戰辰及午頗斬馘賊稍引却旋以譎口抄遶我後會
一武弁中流矢先遁全軍隨潰公挽一武弁衣大呼曰口
口此吾畢命之秋乎吾何忍負國同若曹走也乃武弁
亦竟脫衣而奔公無援遂及於難於是當道疏其口口所
以褒恤公者 詔晉秩少參錄一子諱文燧入冑監勅有
司建祠 賜額表忠俾世世血食公於茲土嗟乎夫公起
家賢科介冑非其長且故憲文吏無臨陣之責公卽持文

議誰督公者顧撰甲孤身血戰死王事其精忠烈節豈不
凜凜千古哉蓋公嘗榜其齋署曰覽鏡徘徊老我成翁雙
鬢白揮戈慷慨平生許國寸心丹則自許者素矣歲久廟
貌就圯有司謀更新而公之孫大用者羹牆祖德抵溫展
廟技淚思葺之卽謁郡伯林公公曰表忠口世 聖朝鉅
典也況公固吾閩先達乃進永嘉令君林侯與之議各捐
俸金鳩工庇材令大用躬董其役口口吟思念公欣然
子來不越月而堂宇一新旣落成妥靈因徵記於余余聞
令甲以勤死事者祀能捍大患者祀公赴義如歸而英風
勁氣若揭日月而行於天至今鯨波廓清寰海幸安於無

事孰非公之精靈。口島卉之魄而捍衛我桑梓於無窮也哉。嗟乎公可謂不死也已。是役也。國子口念厥祖而修廢墜。是口口林公仰前賢而聞先烈。是爲仁仁孝備而公之忠益表表矣。公諱釗字珍夫。號後谷。閩之福安人。賜進士第。中憲大夫溫州府知府林繼衡。

永嘉縣知縣林應翔仝脩

通判王錫命

推官朱道相

孫大用廷芳

督工照磨吳文簡

萬曆己亥孟冬

右碑在迎恩門內本祠門左惟跌處數字已剝

容成道院記

容成太玉洞天道院記

篆額

朝列大夫前直隸寧國府同知玉洞王光蘊撰文

天下之惟奇負異能自取重於世者必有不可得而泯者也其有以自重而又有所託以爲重至於更世越祀而向

往企慕者若旦夕焉豈必耳目之所接哉鳳凰芝草世不

恒觀而好談其瑞

蓬瀛方丈語稱有弱水之隔居虛無雲

氣中世人津津

指譬若身所歷豈固嘗有見之者乎夫仙

經道藏靈真所傳其談玄冥變化之事侈矣六合之外聖人置而不言蓋不欲言固未嘗無之也我烏知海上三山

無芝宮貝闕如圖經所載者耶方壺瀛洲託靈真以傳非

可誣者然寓內若此類者甚夥焦先以名其山子真以名

其谷余嘗道徐陵登焦山纍纍皆土壤耳計焦公所以離

世長往自足於此山者必不若此而已豈世代遷移陵谷

已失其舊而向之恠奇負異者已不可得而見耶太玉洞

天舊在華蓋山之麓故容成子脩真處也天下名山道家

稱洞天者三十有六而其十八爲容成太玉山是也山西

俯郡治烟火萬井喬木脩篁參差蔽天東連睥睨面長江

烟波千頃

遙望蓬萊三島若可觀焉南控積穀山翠巖疊

巖其下

爲謝客巖飛霞洞蓋康樂所嘗遊憩處也跨城而

北其山爲海壇望孤嶼江心梵宮偉麗

兩塔高聳入雲中

估客漁舟片帆上下隱約如畫山之上爲大觀亭恢奇孑
特舊傳有青牛谷五粒松三生石惜蕪沒不可復得惟煉
丹井尙存邑庠之後旁通一竅若門旱涸時兒童篝燈探
之入數百步莫測其底真異境也相傳一日仙人從洞中
達闕成洛陽橋後復著靈異於此因祠焉宋仁宗嘗夢遊
太玉數遣使降香幣元提點曹君構容成道院以居全真
之士黃潛爲之記逮方氏據郡城乃始蕪廢

皇明宏治十年改建於墨池里然宦轍游車至斯地者必登覽而

物色其舊豈

惟茲山之奇抑容成遺跡有不可以

泯滅者是果有所託而重矣予歸臥舊林思得焦先

子真

之徒相與

口老於五粒松林之下適邑侯同安林公鼎新

臺門爰命兒曹稍增飾其勝境媿無以爲茲山重而幸其

未泯姑爲之記如此 峕

萬曆辛丑十月也

右碑在太玉洞天二門內石多剝落上半十數字俱完好近趺處數字亦尙可認惟中間每行缺十八九字後數行則尙完善也

文昌祠義田碑

右碑在縣學大成門外許宏綱撰王繼明書萬厯三十一年立文見壇廟

脩建尊經閣文昌祠碑記

篆額

賜進士第中憲大夫知温州府事清漳陳公相撰

右碑在府學明倫堂後文見府志藝文

陳公相江心寺詩碑

雲樹蒼蒼天際遙孤村寄傲老漁樵龍聽說法依禪宿鶴
下聞琴隔水招鐘鼓隨潮聲隱見樓臺泛月影飄搖江空
短棹歸來未一望星河轉斗杓清漳陳□□

右碑在浩然樓下陳君之名剝損不可識攷孤嶼志知
爲公相又一詩刻書名公□下一字缺疑亦公相也附
錄於左二詩均草書

芙蓉別嶼見真天百折狂瀾夾地旋柱砥江心流不轉樓
開鼇背日孤懸澄波月色移雙塔破曉鐘聲隔萬烟坐此
猶如舟不繫天空海闊任魚鳶公□

重修永嘉縣學記

右碑在縣學姚永濟撰萬厯三十二年立文見學校

楊宗業江心寺詩碑

己酉歲巡海登寺觀甌形勝偶興

孤嶼水心安銀花拍四灘塔高擎日月石壯鎮乾坤萬載
蒼松寺當年白鹿壇憑探山蜃淨在在鞏朝端虞都鳴麓
楊宗業題

右碑在浩然樓下

永嘉學文昌閣碑

賜進士出身文林郎知浙江温州府永嘉縣事海虞陸問
禮撰文

儒學署教諭事舉人沈光岳

司訓毛信 饒與禎 同立

右碑在縣學西文昌廟文見壇廟

蒙泉石刻

萬曆癸丑

蒙

泉

仲冬吉立

泉在華蓋山麓文昌閣下

名勝志昔人於松根得泉甘而且冷曰老松泉又有蒙泉

左右二穴各鑄宋元詩刻老松泉疑卽一清泉有詩見前未詳何時人此泉兩旁巖石被掩遂無一字可見惜哉

告祭漢東甌王文并序

謹按王越王勾踐之後郡志爲勾踐七世孫而我蜀江歐

陽氏家譜爲無疆七世孫郡志惠帝舉高祖時佐漢功立
爲東海王都東甌家譜以爲復以爲越王率不相官蓋自
越王勾踐傳五世至主無疆爲楚所滅封無疆子蹄烏程
歐餘山之陽爲歐陽亭侯子孫因以爲氏王自王東甌後
佐漢總之王爲勾踐無疆孫而於歐陽氏實本源一脉也
國朝洪武 詔稱漢東甌王歲三月八日致祭廟於萬厯
庚辰郡丞新淦劉公正亨捐俸率作新之而遂煥然觀閤
麗埒帝居者匪藉大參永嘉王公叔杲捐貲襄成厥美曷
克臻此矧復重之以記也噫兩公之功德偉矣希亮幸從
宦遊觀廟貌而興本源欣崇祀而感仰前哲獲仲孝享詎

偶然哉

皇明萬厯四十二年歲次甲寅冬十一月己酉朔越祭之
日乙丑浙江温州府泰順縣知縣遠孫歐陽希亮敢昭
告於 漢東甌王神位前曰粵惟 神禹垂啟苗裔
少康封庶守祀會稽使世說越王光大舊基改步烏程
歐陽亭侯子孫因氏我姓鼻祖太守官泳子孫居北
王於歐陽考之史譜千枝萬派共本同源千乘渤海源
遠流長尙書口堅漢晉相望率更納言作述於唐家於
吉州自唐刺史宋代之興深公懋勛嗣焉最著文忠監
丞派衍蜀江逮我 皇朝明於泰和播於海內念於小

子司空嫡孫忝官茲地爲 王故都肇邦綏民助義滅
暴翊漢而帝報功以王奄有舊土孕毓鄒魯遐哉明德
美報到今 皇祖定稱 憲朝釐祀郡縣前賢業移鐘
虞劉公率新王公記成千百斯歲廟貌備然瞻顧興思
躊躇傍徨明禋未舉遷命遂承廉吏窮途用捐裸將物
惟馨潔孚溢趨踰東隅已逝末路茫茫享 王去國惻
矣俛俛曠代幽明奏假一觴駿奔靡遑乘風帝旁東山
之麓華蓋之堂玄馭鏘鏘冕黻皇皇居歆不吐降福無
疆尙饗

萬厯甲寅十二月初二日遠孫歐陽希亮立石

舊府縣志作希堯誤

何旭巖江心寺詩碑

賤旦卽七夕同寅陳惺臺蕭節菴蔡芝房蔣祺生江心寺
夜遊登塔卽事

七夕銀河秋皎潔客中初度懷徒切東甌之勝有江心我
友招攜雅相悅雅相悅堪擊節虛室寒生不用冰綺筵暑
袂何須雪鈞天鐘磬寂還喧城市篝燈明且滅孤嶼風興
落鵲巢危磯水激驚龍穴行行衲子進清茗去去歌人催
劇歎上層階恣眺躡繞過祇園井水冽呼徒汲水渴爭嘗
拍掌垂涎氣欲絕返導迴廊坐碣苔同升高塔牽藤陟筌
篲三疊徹青冥滄海一輪飛玉屑世界低迴景色幽烟霞

掩映風光晰恍疑已在半壺天轉覺猶停中
喘岵粟蘋休誇眼過寬葦航自住心爲結深
閨乞巧尙盤桓淨土散花忘蹴躡良夜偏宜
隙地遊佳情難與閒人說翻身跳入廣寒宮
分得姮娥不老訣

萬厯乙卯孟秋日昭川何旭巖偶成

右碑在浩然樓下考府志知府何廷相萬厯四十一年
任疑卽旭巖同知陳秉正四十年任通判蕭友松四十
三年任蓋卽惺臺節菴名與字合推官有蔣鑒偁亦四
十三年任不知是祺生否

李思誠江心寺詩碑

元嘉縣志 卷二 四
秋日聞繆郡伯蔡別駕薛司理三公視師江心寺四首

甌水迴環枕梵宮
請纓此日集艤幢
登樓海氣千峯倚
檻江濤兩岸通
漫說西平明組練
還輸太傅肅崆峒
醉來似入金山寺
北渚南徐逗晚風
山色潮聲自古今
樓船笳鼓一登臨
雲屯鵝鵲憂方切
風起魚龍恨轉深
塔入中流懸夕照
亭當絕壁變秋林
伫看碧落波瀾靜
敢向江臯說陸沈
攸攸形勝幾回看
俯仰興衰強自寬
晉代衣冠詩碣古
宋時鐘磬佛燈殘
到來插羽依孤嶼
坐久鳴濤動遠灘
江上一尊星並聚
臨風說劍倍生寒
絕島亭亭壓此都
振衣直上倍踟躕
愁喧鏡吹兼天地
靜聽鐘聲乍有

無老子憑欄興不淺諸公擊楫劇相呼西風習習波如縠
霧甲霜戈意已徂廣陵李思誠題

萬厯丙辰仲秋之吉

右碑在浩然樓下思誠兵巡道府志誤作斯誠繆名國
維吳江人蔡別駕疑卽芝房

永嘉令武進莊公去思碑記

萬厯四十七年

右碑在莊公祠內張德明撰文詳壇廟

温州府學重立學田記

温州府儒學重立學田記

篆額

賜進士出身中順大夫奉 敕提督山西等處學政前禮

部儀制司郎中邑人劉康祉撰文

歲在甲子武安戴先生請種吾郡郡刺史施公暨戴邑侯以七都新洲畱畬補學田額僉命伐石紀之教養相資甚盛典也祉時衡文汾晉郡弟子員林懋德孫林輩致羽書請記焉祉爲諸生時竊聞其故實於是爲之記曰嗟乎今世之擁朱旛縮墨綬者曷嘗不以作人爲事哉揆厥展設大都緣飾條例鮮養士之實故貧士不能自拔文治亦少遜焉至巨室右宗反得兼井公私而士不分其餘粒所稱偏肥瘠非耶粵稽郡學舊有田以養士士以故賴之施公署學政時曾一訂版籍厯厯如也鰥特以婚喪特以舉

月課賓興諸費恃以給迄今十載耳遽不相及何以故蓋
歐之學田與他郡異諸郡所以供膠庠備儲峙者大都平
原廣野衍沃之業爲百世利茲僅以江壩浮地海若填之
未幾陽侯之波旋負以去無定土也惟願賢有司權其損
益盈虧之數時時補給之則朝暮滄桑之地孰有急於饗
序是恤者勝於附益豪右也遠矣施公之來守是邦也感
士益貧而田復減其十四與 戴先生言及愴然戴先生
用是檢厥簿書曾有以七都新洲地來獻者豪右幾欲侵
蝕之至是上於郡下縣綜覈焉 戴侯毅然任之得田若
千畝餘尙可以補舊額乎未也吾聞宋室以還沒官之田

及好義推讓之產鱗次版之以資貧士故學甚廣茲固莫能及已若夫十載前之籍尙可任減乎哉此作人者所不能超然處此也且所貴於巨室右宗者謂其履席豐厚好士周急使寒賸藉以成其業斯足述也夫義田之設史不乏書豈其奪海濱天地之利與鬻序爭乎先是時文昌祠歲祀會課田七十餘畝司理李公實雨露焉及今補籍一櫟相繼而下甚矣數公之爲庠序慮長也夫成周司徒一官職教耳所掌財賦戶口與學官保師並隸周官先王寧以教養二之然則學田有記豈徒爲寒士舉火計而非六行圃圉哉文治斌斌將在是已是爲記

天啟四年歲次甲子孟冬吉日

溫州府知府施鵬

同知陳陽長

通判畢勛

李延壽

推官李若愚

經歷楊拱辰

照磨陳肖慶

永嘉縣知縣戴相

縣丞葉成舉

主簿謝廷榮

典史

劉曰寰

溫州府儒學教授戴燧

訓導郭應鳳

徐希曾

杜源

右刻鄉貢進士題名記碑陰在府學明倫堂後職官中
經歷照磨丞簿典及三訓導姓氏府志及舊志均未載
法嚴寺脩舍利塔磚刻記

皇明崇禎壬申廷堅上人以青年妙德新廟脩塔得內記

乃知爲宋元祐壬申賜紫沙門玉句所建奉供舍利塔也
但不誌其舍利所出塔各二十五顆其乙爲工人所圯舍
利色如明珠間或有紫者隨以二十五顆分供雙塔夫自
宋至明前後壬申而一重建將非其再來乎始廷堅祖以
形家言將湮塔有二赤小龍自塔出而止後之脩者慎諸
菩薩戒郡庠生姜受權合十記

右碑刻在法嚴寺舍利塔中塔在殿前東西二座此嵌
東塔

新刻東柄亭碑

東甌積穀山新建東柄亭碑記

篆額

蓋抱濟天下之畧者隨所歷而規天下之全局其在一方
卽劑乎全者以治之其缺飫黍谷之暄也是蓋絲仁質溥
涵多得東方之氣而元精炯貫又沛焉有以達之缺公
祖希菴林公之所以治甌括若甌括之所以拜恩施於
希菴公者洵可述而志缺亘而跨九山之脊像斗間之皜
路焉亦郭翁所指授也緣城諸山惟東峯最秀缺來鎮是
邦而人文代興於吾

明尤盛且士民樂業偷生雖海波數揚而甌幸完固僉謂
地靈世驗矣乃曩歲壬申缺譁於伍數載之間亂踵仍也
丙子之秋幸

聖天子念此一方民以保障命公俾駐節茲土夫公

固以文章名世者卯辰立缺若乃公下車卽殫心經劃

次第又清凡所爲綏德震威者未易枚指焉而獨缺何

寥歟則爲之振厲學官月勤論課載色載笑躬爲之師士

林蔚乎淳興矣缺亭址頽然乃吁而起曰士之不競有繇

也茲峯雖秀拔乃其巔童焉所繇振缺張公黃閣吾家雙

鳳之前迨

神廟乙巳仆於颶風而數科鳴躍似邈余先叔州丞玉淙

翁瓚通政參議憲副之缺席休其敢誣歟余不佞當已未

之役同庠而捷禮闈者四人不可謂非歐隅缺風而矜佩

遂淹抑若是也雖然吾甌人新運開矣雪後必暘幸遇吾
公殷缺先志者余未暇多其子來慕義而竊歎 公之仁
心感物真所稱化工在握缺爲多士祝也爰錫嘉名顏曰
克柄夫以下方值耗斁之餘幸而生全蘇息則缺能自必
乎余是時啣

命備員旬宣西粵道聞斯說而心儀之且夫西粵缺公

曩所樹菁莪之地缺公懷者余將樂觀厥成焉合之斯

舉而知 公之作人誠豈弟之德所優矣缺輝暎誰敢忘

厥所自而枯之人其所謳頌而願爲貞珉者又不知凡幾

也於缺天祐吾 公定有大業以配盛德則黼黻天下

之猷奠安社稷之畧不佞夔

缺

公諱徽初字調復聞之

晉江人

崇禎□□年

右碑在東山書院每行下缺數字撰文者爲王維夔林
公徽初兵巡道也乾隆府志脫初字作林徽誤

三生石三字

太玉洞教主長谿舍

真子張大光印證

三生石

中書舍人柳楷重模

訓導陳端陳新鄭瑞同游

三生石在縣學教諭官舍後華蓋山趾高約六七尺正面東北向篆書徑四寸太玉洞十五字隸書中書舍人十八字正書張大光縣教諭福寧人柳楷瑞安人童子中書舍人陳端府學訓導陳新鄭瑞縣學訓導阮相國金石志列入元時不知柳楷等皆明時人也又以爲當時舊刻猶存亦爲失考

蒼玉徑三字

蒼玉徑

華蓋山東南麓一石特起高約四尺餘面東篆書蒼玉

徑三字約徑一尺面西又有正書蒼玉徑三字其旁小字數寸不可辨不知何時人題

飛霞山磨崖

雲根

竹巖書

東山書院門外側立一石高約丈許上刻雲根二大字字徑三尺餘竹巖乃僉都御史王諍之號

嶼山磨崖

把釣 索觴

右四字磨崖在五十都蓬溪嶼山把釣二字隸書索觴

二字正書山有深潭四面峭壁四字分勒左右最高處
無款識字特奇偉相傳為朱子書

侍御史郡侯閻公性聖生祠碑

郡人李光春撰崇禎十四年立在府城隍廟殿後東壁

國朝碑目 附錄

御製臥碑文順治九年立在府學明倫堂縣學同

御製訓飭士子文康熙四十三年立在府學明倫堂縣學同

御製訓飭士子文乾隆五年立在府學明倫堂縣學同

明太宗伯顧公錫疇祠記巡道陳聖治撰順治年立在江心寺文見壇廟

邑侯王公世顯生祠碑記邑人王錫琯撰康熙三年立在府城隍廟

古蹟 金石 下

司李嵇公宗孟遺愛碑

教授邵仲陟撰康熙六年立在拱辰門外官廳

邑侯王公世顯陳公聖俞去思碑

杜臻撰康熙九年立在開元寺巷永嘉義塾三

祠公

重建譙樓碑

巡道許重華撰康熙十二年立在譙樓上

郡守王公國泰遺思碑記

邑人王錫珪撰康熙十一年立在火神廟前

提督學院王公揆造士紀德碑

邑人王錫珪撰康熙十五年立在中山書院

學院顏公造士碑記

邑人陳振麟撰康熙十四年立在東山書院

重修雙忠祠碑

商邱宋竿撰康熙四十四年立在祠內文見壇廟

東山書院塗田記

雍正九年立在東山書院

留雲亭碑

巡道寶坻芮復傳撰雍正十年立在東山書院文見學校

重建大觀亭碑

巡道芮復傳撰雍正十年立在東山書院明車大任詩刻碑陰

重修夢草堂碑

衛守備劉超賢撰雍正十二年立在城守營署後明高賓夢草堂記碑陰

浙江分巡溫處道題名後碑

在道署大堂右自許重華至佟國勳共九人俱在康熙二

十八年前莅任
疑卽佟君所立

建橋功德主姓氏碑

康熙三十一年立
在南門外三港廟

重新永嘉縣廟學碑

邑人洪勛撰乾隆十一年
立在縣學大成門文見學校

補建泮池橋碑

學政長洲彭啟豐撰乾隆
十八年立在府學大成門

重建鹿城書院碑記

學政閩汀雷鉉撰乾隆二十
年立在鹿城書院文見學校

移建尊經閣碑

教授王執玉撰乾隆二十
年立在府學文昌閣下

重葺且園記附七言律一首

巡道鐵嶺徐綿撰乾隆
二十七年立在道署

中山書院碑記

學政錢維城撰乾隆二十八年立文見學校

重修府學碑記

知府樹城李琬撰乾隆二十六年立

中山書院碑記

知府李琬撰乾隆二十九年立文見學校

墨池二大字

一在府署乾隆三十二年李琬刊一在鎮署總兵黃大謀書

郡尊李公蓮塘講學處畫像碑

肄業生童同勒石無年月在中山書院

重修永嘉縣廟學碑

知縣傅永綽撰乾隆三十六年立

重葺且園記附七言十韻詩一首

巡道昆明楊漢撰乾隆四十二年立

文筆峯塔碑

知府鄭澐撰乾隆四十二年立

温州衛義學記

衛守備安如崙撰乾隆四十二年立

近又遷義學於

衛署之西南

禁止莊長告示碑按察使無錫秦瀛撰乾隆六十年立

江心寺大殿碑閩浙總督伍拉納撰乾隆六十年立

重修府學碑知府楊兆鶴撰嘉慶十一年立

重修永嘉縣學記知府楊兆鶴撰嘉慶十一年立

且園栽花記巡道汾陽韓克均撰嘉慶十九年立

府學紀事碑巡道歙縣朱文翰撰嘉慶二十三年立

温州府重修校士館記在大門外

重修城隍廟碑知縣嵒峨徐雲笈撰道光三年立

重建永嘉縣儒學記學政寶應朱士彥撰道光八年立

重建永嘉縣儒學記知縣長洲張久照撰道光九年立

古蹟 金石

重修積穀山飛霞觀記巡道樂陵賈聲槐撰道光九年立在飛霞觀臥樹樓下

重修東山書院記巡道賈聲槐撰道光十年立文見學校

温州府育嬰堂義田記知府南豐劉煜撰道光十三年立育嬰堂

清理書院育嬰堂塗田記知府劉煜撰道光十五年立中山書院

二此園壁記并詩知府劉煜撰道光十五年立府署

重建萬安橋記教授車宸英撰道光八年立開元寺巷口

重建巽吉山東嶽廟碑道光年立廟內

重修譙樓碑記邑人周衣德撰道光十九年立

重修永嘉縣儒學碑訓導朱美鏐撰道光十二年立文見學校

重修溫處道署記知府南豐劉斌撰道光十三年立道署大堂

附祀明太僕少卿王忠節公碑記邑人黃仁瑞撰道光二十三年立在晏公廟

東甌義塾壁記知府張璈撰道光二十五年立

重建關聖廟碑巡道慶廉撰道光三十年立在廟門外文見壇廟

重建三元宮碑記福州梁章鉅撰道光二十九年立在三官殿巷

重建東山書院碑記閩郡紳士勒石為知府張璈立無年月當在道光季年附此

五靈廟碑知縣清苑湯成烈撰咸豐元年立在廟門內

重建永嘉縣學碑學政吳縣吳鍾駿撰咸豐三年立文見學校

尊經閣祀字祖經師記吳鍾駿撰咸豐三年立在府學文見學校

肄經堂碑記巡道慶廉撰咸豐三年立

巡道慶廉畫像碑記閩郡士民同勒石無年月在中山書院按當在咸豐三年

總戎池公建功德政碑

咸豐四年弼局紳董陳承暄等立在東甌王廟

倉聖祠碑記

教授秀水金衍宗撰咸豐五年立在祠內文見壇廟

郡守王公景澄德政碑

平陽余思誠撰咸豐八年立在東山書院

倉聖祠借字局碑

學政吳存義撰同治七年立在祠內

重建大觀亭記

知府丹徒戴榮撰同治七年立在資福寺

重修二此園記并二此園八景詩

同在上在府署

資福寺改建山房記

同在上在資福山

福壽二大字

提督秦如虎書同治八年刊在府城隍廟

重修溫處道署記

巡道方鼎銳撰同治八年立在道署

重修且園記

同上

重建中山亭具瞻樓記知府裕彰撰同治十三年立在府署大堂右

重修温州府署記知府裕彰撰光緒元年立在府署大堂左

溫郡重修校士館記知府裕彰撰光緒元年立在大門外

重修府學碑記巡道方鼎銳撰光緒三年立在大成門

修復忠烈廟碑記教授戴咸弼撰光緒三年立在簡巷忠烈廟內文見壇廟

東甌王廟碑記秀水朱燹尊撰原碑佚光緒三年知府張盛藻補書重立在廟門左文見壇廟

浮屠公所碑記候補府鄒仁溥撰光緒三年立在來福門外

宋高宗清輝二字石刻教授戴咸弼摹刊光緒三年立在江心寺

新建驛頭埭記候補府梁銘樹撰光緒六年立在二十六都驛頭

溫衛社倉記衛守備王成美撰光緒六年立在衛署西

未雨亭記

教授戴咸弼撰光緒七年
立在三十二都雞籠嶼

永嘉縣志卷之二十四